

D. D.

DISSERTATIO JURIDICA,

DE

PRÆSCRIPTIONE
CRIMINUM,

QUAM

SUFFRAG. CONSULT. FACULT. JURID. IN
REG. ACAD. ABOËNSI,

PRÆSIDE

MATTHIA CALONIO,
JURIS PROF. REG. ET ORD.

PUBLICO EXAMINI SUBMITTIT
ANDREAS WILHELMUS ORRÆUS,
WIBURGENSIS.

IN AUDIT. MAJORI DIE XV. JUNII 1785.
HORIS A. M. CONSUETIS.

ABOË

TYPIS VIDUE R. ACAD. TYPOGR. J. C. FRENCKELL.

13.

DISSEKATIO TURIC

PRÆSCRIPTIONE
CRIMINUM

ИМЕНИА СОСТАВЛЯЕТСЯ ПОДАЧА
СОУДУ ВЪ ДѢЯТЕЛЬНОСТИ

СЪДІЯЩІЙ

ОБІЦІЯ КЛІЧТАМ

ВІДДАЄТЬСЯ СЪДІЮ

СЪДІЯЩІЙ ОБІЦІЯ
СЪДІЯЩІЙ ОБІЦІЯ

СЪДІЯЩІЙ

СЪДІЯЩІЙ ОБІЦІЯ
СЪДІЯЩІЙ ОБІЦІЯ

СЪДІЯЩІЙ

СЪДІЯЩІЙ ОБІЦІЯ



Supplemento, quod §. 32. C XVII. RåtegBl. non
ita pridem addidit *Constitutio Regia de d. 20. Februarii.* 1779. ang. ändring uti *Allmåanna Lagens Stadgande i
åtskilliga rum*, locupletatam vidimus Jurisprudentiam patriam nova & tantum non incognita sibi antea de PRÆSCRIPTIONE CRIMINUM doctrinam. Ad cuius tamen genuinam naturam ac indolem, limitesque quibus concluditur adcuratius describendos, nemo, quantum nobis quidem constat, suam hactenus contulit industriam. Cum per plurimis jam olim gentibus hoc placuerit institutum, non quidem desunt in exoticis Scriptoribus, qui partim ex generalibus prudentiae Legumlatoriae principiis, partim ex domesticorum suorum Jurium scitis egregie omnino hanc illustrarunt materiam (*). Verum cum quæ ab his

A

tra-

(*) Præcipios de hoc argumento Scriptores hos enumerauit Jo. CHRISTOPH. KOCH in *Institt. Jur. Crimin.* Jenæ 1779. editis Lib. III. c. 33. pag. 658.

WOLFG. AD. LAUTERBACH *Diss. de præscriptione criminum.* Tub. 1655. Vol. I. *Diss. 65.*

□) 2 (□

tradita sunt, nostratisbus quippe adhuc vix alio censu habita, quam quæ extra fori usum collata otiosis tantum ingenii pascendis convenient, paullo plerisque ignotiora esse suspicari licet; oppido quoque multa illis admista sint, quæ a novissimi nostri juris placitis quam longissime discedant: & operæ pretium facturos, & novitatis etiam, cui insigne adeo ad commendationem pondus inest, gratiam nonnullam habituros nos arbitrati sumus, si laudatam de præscriptione criminum doctrinam, sub illa, qua nostram jam dum civitatem adepta est facie specimi-

CONR. STRAUSSIUM *Diss. de præscriptione delictorum.* Argentor. 1667.

OTTON. FRID. KNORRIUM, *Comment. de præscriptione criminum.* Halæ 1695.

SAM. STRYK *Tract. de Actionibus forens.* Sect. III. m. 2. axiom. 5.

CHRIST. THOMASIUM, *de præscriptione Biganziæ.* Lips. 1685. recus. Halæ 1733. & in *Collect. Uhliana* T. I. p. 183. seqq.

JOH. RUD. ENGAU Jurist. *Betrachtung von der Verjährung in peinlichen fällen.* Jena 1750. 8:o.

JOH HENR. GOTTL. von JUSTI *Abhandlung von der Verjährung der Missetthaten:* in desselben Hist. und Jurist. Schriften 1. Band. p. 423. seqq.

Quibus adde

AUGUST. DE LEYSER *Medit. ad ff. Specim.* 515. &

ANONYMUM, *Abhandl. von der Verjährung der Missetthaten, in Er- gesungen der Vernunftigen Seele.* II. Bund. p. 141. seqq. Leipz. 1746. 8:o.

cimine Academico, extremas quasi ejus ducendo lineas, repræsentaremus. Levem ac tenuem o-
pellam Tu LECTOR BENIVOLE æquo acci-
pito animo!

§. I.

PRAESCRIETO, generalissime sumta, amissionem notat *juris*, ob neglegitam per certum temporis spatiū ejus persecutionem; ut proinde tria sint, quæ ad formandam illius ideam requiruntur, *jus* nimirum quoddam, cui valide renunciari possit, alia enim jura præscriptioni obnoxia esse nequeunt; *prafinitum* certum juris istius persecutioni tempus; & persecutionis hujus per omne id tempus neglegitus. Quia vero jura omnia ex dupli*c*i promanant fonte, *factis* nimirum vel *licitis* vel *illicitis*; patet, duplicem etiam constitui posse præscriptionem, *civilem* unam, qua jura e factis *licitis*; *criminalem* alteram, qua jura e factis *illicitis* provenientia amittuntur. Cum porro nullum cogitari queat *jus*, cui non aliqua respondeat obligatio; & proinde *illo* sublato, *hanc* quoque cessare necesse sit: haud difficulter intelligitur, posse utramque præscriptionis speciem dupli*c*i considerari respectu, quatenus scilicet vel *jus* ab una parte *extinguit*, vel *obligationem* ab altera *tollit*. Atque hinc quidem est, quod specialiorem præscriptionis naturam explicaturi Philosophi varias varii ejus condiderint definitiones, aliis nempe *juris* potissimum *extinctionem*, aliis contra *obligationis cessationem* & pendentem inde novi *juris* *adquisitionem* respicientibus. Quemadmodum autem hæc ambo separari ab invicem nequeunt; & o-

manis ideo qui in hoc puncto Doctores inter adesse vide-
tur dissensus, non tam in re ipsa, quam in diverso potius
ejus concipiendi modo constat; ita sive *præscriptionem*
criminalē amissionem esse dixeris juris, *delicti alienus rei*
rum in foro conveniendi & satisfactionem ab eo exigandi, sive
liberationem rei ab actione criminali, **PER LAPSUM TEMPO-**
RIS LEGE DEFINITI, perinde nobis fuerit. Utrum libet
enim placeat, res eodem redibit. Cæterum hanc præ-
scriptionem toto quod ajunt cœlo differre & ab *abolitione*
criminis, qua cursus actionis criminalis ex mera gratia fi-
stitur facinusque quasi non patratum singitur; & ab *ad-*
gratiatione, qua reo condemnato pœna remittitur; & a *re-*
stitutione denique *in integrum*, qua amissa vel lœsa delin-
quentis existimatio redintegratur, evidentius est, quam
ut pluribus id ostendere opus sit.

§. II.

Controversiam an *præscriptio juris* sit *naturalis* an
mere *civilis* nihil fere continere solidi, sed in puram pa-
tam abire logomachiam oculatioribus jani dudum est ob-
servatum. Et sane cœcutire admodum eum oportet, qui
non videat *remotum* ejus fundamentum in *præcepto juris*
naturæ de pace ac securitate humani generis promoven-
da, de rebus derelictis eam ob causam occupanti addi-
cendis, & diligētia a dominis in custodia ac vindicatione
rerum suarum adhibenda; proximum autem in legibus ci-
vilibus, quæ quibus sub conditionibus & in quem diem
quæque res pro derelicto habenda fit, & quæ negligentiae
species juris ablatione puniri mereatur, generaliter deter-
mi-

5

minant, quærendum esse. Frustra quoque disputari, utrum in definiendo præscriptionis tempore ad *præsumtæ derelictionis probabilitatem*, an ad *necessitatem coercendæ negligentiae* Legumlatori magis respiciendum sit, facile largientur, quotquot re omni adtentius considerata dicereint, non eandem esse jurium omnium de quorum amissione quæri in foro contigerit indolem, nec eundem in publicam securitatem influxum; adeoque pro varia eorum diversitate, in constituendo singulis peremptorio quodam, quo elapso, per *non-usum* extinguantur, termino, modo illius modo *hujus* potiorem, habendam esse rationem. Aequitatem autem ipsius præscriptionis, qua *civiles cauſas*, unanimibus jam olim suffragiis omnes omnino agnoverunt gentes. Luculentissime namque perspexerunt, illa non admissa, nullum futurum litium finem, nullam inter desides & vigilantes differentiam, & nullam denique dominiorum certitudinem, quo tamen Atlante & rei familiaris curam & communem tranquillitatem sustentari in confessu est. Num vero pro æquitate præscriptionis *criminalis* paria stent rationum pondera, a multis est dubitatum. Fuerunt, qui eam indistincte in gravissimis etiam delictis admittendam e re publica esse judicarint; cum ex adverbo alii eandem *ceu* periculofissimorum eventuum plenam & securitati civitatis maximopere inimicam damnandam prorsus evincere fategerint. Quibus hi utrinque pugnant argumentis, si, compendiariam secuti rei enarrandæ rationem, exhibuerimus, multum iis, quæ porro dicenda veniunt, lucis nos accensuros confidimus.

§. III.

Qui patronos se profitentur præscriptionis criminalis hunc fere in modum suos subducunt calculos. Dicunt nimirum non esse naturalis necessitatis ut puniantur crimina: id quippe si adfirmetur, jus etiam adgratiandi, quod tamen nemo proscribendum e civitate contenderit, sublatum iri. Quousque igitur exigere poenas vel remittere conveniat, ex publica utilitate esse æstimandum. Hanc autem ex iisdem plane rationibus, quæ civilem præscriptionem legibus facienda persuaserunt, efflagitare, ut & crimina certi temporis decursu præscribantur, quo videlicet sic accusationum aliquis sit finis, nec per omnem vitam, propter solam civitatis in perquirendis maleficiis negligentiam, spem inter & metum suspensi detineantur, quibus criminis alicujus insimulari acciderit. Verum quidem esse, sollicitam omnino communis securitatis in civitate agendam esse custodiam: ad hanc autem procurandam nullatenus conducere, ut patrata olim crimina, oblivione jam pridem conseputa, quorum odium jam deflagravit, & e quibus nullum amplius morum innocentiae offendiculum est extimescendum, in scenam denuo suspiciosa diligentia protrahantur: ut bona fama & existimatio civium, emendatori & inculpata per longam annorum seriem vitae actione parta & confirmata, in novum adducatur discrimen: ut tecta jam multa cicatrice vulnera intempestiva crudelitate refricentur: & ut servidæ lubricum juventæ, miseratione quam ultione dignius, & ab æquanimis quibusque ultro jam condonatum, indelebili in proiectæ ætatis sene ignominiae macula adspergatur,

con-

conjugi plerumque suæ & liberis, propinquis item, quantumvis innocentibus, non unica tantum ratione nocitura: Majori hoc scandalo, quam ad vitam recte instituendam incitamento civibus futurum, quod per inexorabilem legum duritiem ne ineuntis quidem adolescentiæ vitia magnis emendari posse cernerent virtutibus. Tempus præterea, quanto longius a die perpetrati criminis effluxerit, tanto spissioribus tenebris factum ipsum singulaque ejus momenta circumfundere. Hinc non posse non summam oboriri, jam culpæ jam innocentiae probandæ difficultatem, summamque idcirco delicti incertitudinem, quæ pertinacissimam expertissimi etiam Judicis operam eludat. Exsecurandæ & detestabili delatorum cohorti, in turbido in primis pescari solitæ & lucem anxie refugienti, latam ea re apertum iri viam, ad bonos viros, pessimi eujusque nunquam non inimicos, sycophanticis calumniis & confictis probationum simulacris, aliquid tamen quod hæreat relicturis, vexandos aut circumveniendos. Quo ipso simul Judicia, absque ullo in publicam rem fructu, protractis in longum ambiguorum criminum inquisitionibus onerari necesse foret. Ad hæc autem omnia, & quæ his connexa sunt incommoda radicitus tollenda præscriptiōnem unam efficacissimum esse remedium, & tale quidem, quo cum prudenter adhibito, securitas civitatis farta utique & tecta persistere queat.

§. IV.

Adversam contra qui tuentur sententiam hanc fere ratiociniorum suorum faciunt summam. Coaluisse inquiunt

unt in civitatem homines securitatis obtinendæ cauſa. Hunc in finem eos jus belli in ſui conſervationem ſibi connatum in Principem tranſtuliffe. Ex hujus ergo officio eſſe follicite cavere ne crimina maneant impunita & ut careant malis hominibus provinciæ. Si tempus ſolum, cum latitandi calliditate coniunctum, ad facinorofos a poena liberandos valiturum adſumatur, probabilem his nunquam impunitatis ſpem defutaram. Hac vero, ma-
xima nempe ad peccandum illecebra, vel e longinquo oſtentata, omnem eos, qua latere poſſint, curam duplicatu-
ros; nihil quidquam eo nomine intentatum relicturos;
quin imo nova eaque atrociora ſcelera aufuros: de pu-
blica autem quiete acutum tuni fore & conclamatum. Quæ
in civilibus præſcriptionem legibus ſancientiam commen-
dant rationes, eas ad criminales cauſas transferri mini-
me poſſe. Manifestum namque eſſe, nullam, ſi vel vice-
nicio elapſo reus promerito adſiciatur ſupplicio, jurium ac
dominiorum incertitudinem inde orituram: nec, intro-
ducto jamdiu gravissimas ob cauſas proceſſu inquisitorio,
negligentiæ aliquam coercitionem hic in censum venire
poſſe, quippe quod absurdum fit cogitare civitatem dilata-
tæ perfecutionis culpam in ſe fuſcepturam, cum & cri-
men & ejus auctorem, vel hunc ſaltim haſtenus ignorar-
verit. Eventurum potius adoptato hoc remedio, ut in
criminalibus, præter evidentissimam naturalis iuſtitiae ra-
tionem præſcriptio ſemper curreret contra ignorantem &
agere non valentem, quod tamen ne in civilibus quidem,
niſi per modum exceptionis in paucissimis obtineat caſi-
bus. Quid? quod ſaluberrimum hoc iuſtitutum ad tuen-
das adquifitiones bona fide nixas excogitatū, jani in ma-
la

læ fidei & nefariæ astutiæ præsidium detorqueretur. Ad-
dunt porro, vel nudam occultationem scelerum magnæ
bonis omnibus in civitate esse offensioni: Hanc autem
multoties aggravatum iri, sicubi, cum tandem detecta in
vulgus iunotuerint, iulta dimittantur. Non scilicet ulla
temporis mora adeo in hominum animis obliterari crimi-
num odia, quin iisdem in apricum productis vehementis-
sime recrudescant. Miserationis motus, quibus ratio non
adsistit, momentaneos esse & cito evanescere: propriæ
contra securitatis studium alte humanis mentibus sedere
infixum, & id efficere; ut graviora flagitia vel in ipso se-
pulcri limine supplicio pianda deponscant. Falsam quo-
que esse clementiæ speciem, non clementiam sed crudeli-
tatem rectius nominandam, qua scelestis publicæ pacis
turbatoribus, modo tempus lucrari noverint, sic succur-
ritur, ut optimis quibusque tanto major ex eorum auda-
cia incutiatur metus. Si qui ad saniorem reversi frugem
vitæ ante actæ maculas morum honestate eluere labora-
rint, iis pro re nata abolitione actionis, adgratiatione,
aut qua licebit alia honesta ratione subveniri posse, nec
opus esse, ut, ducto ex rarioribus exemplis argumento,
generali sanctione inemendabili multorum malitiæ fomes
administretur. Frustra denique ad incertitudinem crimi-
nis & ejus probandi difficultatem provocari, cum non esse
& non adparere in Jure semper sint idem, nec quis un-
quam nisi plene convictus condemnari debeat. Verbo:
repugnare præscriptionem criminalem fini civitatis, &
quæsitos undecunque colores, ad palliandam tantummodo
ejus iniquitatem ac laxandum publicæ disciplinæ vigo-
rem, pertinere.

§. V.

Visis autem jam, per transennam quasi, palmariius quæ pro præscribendis aut non præscribendis criminibus urgeri siveverunt argumentis, haud difficile erit constitue-re, quid de omni hac controversia sit judicandum. Singulis enim, quæ utrinque allegantur, rationum momentis rite perpensis, liquido satis patere arbitramur, ad labefac-tandam communem securitatem, ad cuius tamen arctissimam custodiam pœnales omnes collineare oportet leges, comparatam esse eorum doctrinam, qui accusandi facul-tatem in quibusunque, atrocissimis etiam, criminibus certi temporis lapsu perimendam statnunt. Non nega-mus exstisse olim & adhuc dum existere gentes, quibus hæc fere arrisit Jurisprudentia. Observavit e Plutarcho LAUTERBACH diff. cit. Thes. 2. sanxisse apud Athenienses SOLONEM, ut nulla non crima vicennali silentio extin-guerentur. Mirifice quoque Romanis placuit Præscriptio. Qui tamen, procul dubio quod viderent probabilitatem præsumptionum emendatae jam vitæ delinquentis, perducenda ad liquidum caussæ, & finis pœnae adhuc obtinenda genera-tim spectatam, quippe cui suam de hac materia philoso-phiam inaedificabant, esse in ratione inversa ad atrocitatem feeleris, hoc adhibebant temperamentum, ut vicennii inte-gri lapsum nonnisi ad atrociorum præscriptionem ne-cessariam judicarent, quinquennio solum minus atroci-bus & levioribus præstituto (°). Nec desunt in hodier-nis

(°) Disputatur inter Doctores an ulla legibus Romanis excepta fuerint crima, quibus præscriptio opponi non pos-set? Adfirmant hoc nonnulli, aliis eorum *Apostasiam* tantum

nis Europæ nostræ populis, qui nimia Juris Romani veneratione capti eadem pæne hac chorda diu satis oberrant. At tantum abest ut his auctoritatibus sucum nobis fieri patiamur, ut potius ex recentioribus ipsarummet harum gentium legibus evinci posse existimemus, agnovisse illas, magnis hoc institutum, ubi ad graviora crimina prolatum fuerit, premi incommodis. Nemo quidem est qui non videt, præscriptioni vicennali, ex ipsa sua longitudine, utpote qua evenire necesse est ut ne vel sexcentesimo quidem euique reo prodesse queat, multum accedere excusationis. Verum cum & hanc a novioribus Legumlatoribus restrictam; tricennalem aliam, imo & quadraginta annorum additam; atrocissima præterea crimina præscriptibilium numero prorsus exempta cernere liceat; vid. *Jus Pruss. Cod. Frid. P. II. Lib. III. Tit. V. Art. 2. §. 42.* *Const. crim. Theref. Artic. XVI. §. 9.* *Const. Elect. Saxon. P. IV. 46. apud CARPZOV. p. 1478.* *Edict. Saxon. de Duellis & priv. vind. d. 2. Julii 1712. §. 43.* quam quæso ejus rei reddes rationem, si non hanc, quod longissimi etiam temporis præscriptionem publicæ securitati aliquando damnosam accidisse, experientia docuerit. Lucratos id fortasse hos dixeris coacervato hoc aliarum super alias emendationum exceptionumque cumulo, ut totidem quasi

B 2

nova

parricidium & partum supposititium, aliis præterea *abortum & incestum* ad excepta referentibus; verum negant idem plerique. Atque hi quidem *Apostasiam & partum supposititium*, per suammet namque naturam impræscriptibilia, ad excepta perperam referri; cætera vero omnia, atrocissima etiam, præscriptioni obnoxia fuisse, contendunt. cfr. *THOMAS. diss. cit. & MATTHEUM de Criminib. p. 644. seqq.*

nova repagula improborum proterviae objecisse videantur. Sed quam tricis hisce Jus suum criminale incertum & preter necessitatem impeditum reddiderint, peritis rerum aestimatoribus sua velut sponte in oculos incurrit. Ut proinde vix mereatur horum in actionum spatiis dimidiendis fedulitas, quæ aliis, qui simpliciori juris judiciorumque formæ maximo cum suo commodo adsueverunt, imitanda proponatur. Interim quidquid sit, neque eorum probamus opinionem, qui, vanis exagitati terroribus, ne in levioribus quidem delictis ullum accusationibus terminum præfigendum esse clamitant. Certe, quæ pro sua sententia adserunt argumenta nihil aliud demonstrant, quam ibi ponendum esse præscriptioni criminum limitem, ubi communis pacis ac quietis incipit periculum. Adsumto autem hoc, cuius veritatem undique agnatum iri putaverim, principio, aut valde fallor, aut non difficile admodum fuerit, illam invenire lineam, qua *perpetuas & temporarias* in criminalibus *actiones* distingui conveniat. Largiuntur omnes, constitutis civitatibus, pœnales leges & criminalia judicia in locum privatæ vindictæ, quam in statu naturali *laeso de laidente* repetere omnino licebat, surrogata, & quam sui desensionem in Principem resignaverant cives, eandem illos, quia immo efficaciem, a Principe vicissim sibi fuisse stipulatos. Ut ergo *translati & adquisiti* juris æqua, qualis utique decet, obtineat compensatio, necesse est, ut, quatenus probabile fuerit homines universim spectatos in statu naturali, rationabiliter cum caussa, obstinatum ad nesciendum animum fuisse retenturos; eatenus & puniendi voluntatem legibus civilibus illabefactam servandam esse statuat. Quæ enim ratio, ut magis in-

dulgeat scelerato capiti civitas, quam indulturi eidem extra civitatem fuissent singuli? Sed an ulla, & quanta ab his speranda fuisset indulgentia? Sane nec prolixa admodum, nec plane nulla. Etenim si hominum qualia sint consideremus ingenia, facillime, quod opinor, adparebit, sic eos esse comparatos, ut cum ab una parte leviorum injuriarum, quæ & reparari commode possunt, & quietam vitæ, libertatis bonorumque possessionem non turbant, brevi plerumque obliviscantur, ab altera, vix ulla temporis mora ad flagitorum, quibus enormiter læsa fuit propria sua vel aliorum securitas, memoriam penitus abjiciendam induci semet patientur. Si cædes, si rapina commissa, si furtum factum, si casæ aut domus nefario incendio deletæ; & ignoretur auctor: jacet alte reposita animo vindictæ libido, quæ tamen, simulacris innotuerit, cum impetu prorumpit, & nisi idonea intervenerit satisfactionio in captandis sui explendæ opportunitatibus soller-tissime laborat. Testatur hoc omnis ævi historia. Testantur omnium barbararum gentium, quæ adhuc dum in naturali agunt libertate exempla. Hinc quo minus in hominum situm est potestate, stimulantes ad ultionem acaleos suis evellere pectoribus, eo majori de jure postulant, ut flagrantissimo huic suo desiderio, quoad ratio id ferat, se accommodent leges, nec admittant, ut propter folius temporis lapsum ultrix nocentem poena deserat. Neque est quod dicas, vitia eorum turbidosque adfectus normam Legumlatoribus nos obtrudere. Caret enim vitio, quæ ratione regitur vindictæ cupidio. Et delirus sit oportet, qui eam, conservatricem scilicet humani generis, sine Numine mentibus nostris inditam putave-

rit (*). Cæterum ubi mitius delinquitur, quemadmodum remissius multo in læso exserere se solet sui ulciscendi studium, interjerjecto nonnullo temporis spatio facile sedandum; ita nec repugnat actiones ex iis præscriptione tolli.

(*) Egregie ad rem nostram faciunt quæ habet Illustr. MICHAELIS in *Præfat. ad P. VI. Operis de Jure Mosaico p. 128. & 130.* Diesen trieb, inquit, diese natur, (Rache zu üben) bringen wir alle, wilde, civilisirte, rafinirte gläubige, lasterhafte, tugendhafte, wiedergebohrne, heilige, mit in die bürgerliche Gesellschaft binein: Nur dem natürlichen Recht der Selbstrache sollen wir gleich beym Eintritt entsagen. Was ist raiſonnabler als dass sie uns, wenigſtens bey schweren uns unerträglich vor kommenden Beleidigungen, ein Äquivalent für das giebt, dem wir entsagen, das heißt, das Geschäfte übernimmt, uns Rache zu verschaffen. Wäre es mol wahrscheinlich das einer in die bürgerliche Gesellschaft trate, ohne diese Bedingung wenigſtens als ein pactum tacitum zu erwarten? Geſetzt aber der Staat thäte dies nicht, sondern sagt du follst gar nicht gerochen werden, auch kleine Rachbegierde haben, deine gantze Natur soll umgeſchaffen ſeyn; ſo würde man fühlen, dass man noch nicht umgeſchaffen ist, und ſich denn ſelbst rächen. - - - Es ist unausbleiblich, wenn man im Staat nicht Slaven, sondern freye Leute bat, und ibnen nicht ſatisfaction, ich verſtehe aber darunter nicht blos Ehrenerklärungen und Abbitten, sondern Rache ſchafft, ſo tritt die Selbstrache wieder ein, das fürchterliche Ding, das ſo oft den Unſchuldigen trifft, den man in Verdacht hat, und ein Uebel vertaufendſältiget, indem der Beleidigte es zehnfach zu erjetzen ſucht, des erste Angreiffer ſich wieder dafür rächet, und auf diese weise ein viele Jahre lang dauren könnender Abtausch von Beleidigungen und Gegenbeleidigungen erfolget. Will diſ der Geſetzgeber verbüten, ſo muß Er bedenken, dass Er nicht geduldigen Schafen, und zum leiden geschaffenen Gewürmen Geſetze giebt, ſondern Menschen.

telli. Quotsum enim nimia ista in minoribus criminibus, quorum jam exolevit memoria, persequendis diligentia? Sane ea re nihil efficeretur aliud, quam ut consopitis inimiciis refuscitandis multiplicarentur jurgia, civesque ad continuas similitates alendas quasi invitarentur. Quanto autem hæc omnia evidentiora sunt & naturæ hominum rationali convenientiora; tanto magis venerari nos oportet sapientiam præscriptivæ legis in patria jamjam perlatae. Hæc namque immotis, quæ exhibuimus, principiis prudentissime superstructa, dum inferendis leviorum delictorum, quorum vel pæne evanuit vel saltim obscurata jam est recordatio, ad cœlum, fatali iis termino præfinito modum ponit & vitiligatorum calumniam refrænat; constituta contra actionum ex gravioribus maleficiis perpetuitate, sceleratorum audaciam fortissime coeret, suamque adeo ipsa humanitatem ea temperat severitate, ut non possit non publicæ disciplinae intemeratus suus constare vigor. Quod quidem ex iis, quæ per partes dicenda jam erunt, luculentius adparebit.

§. VI.

Quod laudatam legem enucleatius explicaturis primo loco dispiciendum occurrit, hoc est, *quænam sint crimina, in quibus obtinet præscriptio?* Ad quam quæstionem ut distincte responderi queat monendum videtur, criminum gravitatem in ferendis quidem legibus ex morali actionum ipsarum qualitate, earumque in perturbandam communem civitatis salutem ac securitatem effectibus, esse aestiniandam; lata autem lege, ad inveniendam illorum quan-

quantitatem sufficere, ut quæque ad pœnam sibi statutam, suæ quippe gravitati adtemperatam, referantur. Si igitur jam ex pœnarum magnitudine, delictorum strictius loquendo talium, quæ Jure patrio notantur, censum, qualem quidem nostrum desiderat institutum, inire nobis licet, in duas velut *clastes* dispescere eadem convenerit; *unam*, quorum pecuniaria vel plane non, vel saltim non in totum permittitur expiatio, *Urbota mÅ XVII. 32. RB.*
Tå man med penningar ei bôta mÅ I. 2. StrB. Alteram eorum, quæ solo ære lui possunt. Ad priorem, ut ad intelligendum primum est, non ea modo pertinent, quibus pœna vel *capitalis*, sive *qualificata* *XXI. 3. IV. 1. XI. 1. X. 1. XIV. 1. MGB.* sive *simplex* *I. 1. in pr. V. 1. 2. in pr. XXIV. 1. XLII. 2. ibd.* vel corporis *adflictiva* qualiscunque cum vel sine famæ ac existimationis jactura, *VIII. 1. 2. IX. 2. X. 2. XI. 3. 4. XV. 2. ibd.* vel *amissio civitatis* *I. 4. IV. 7. ibd.* vel coercitio aliqua publicam *ignominiam* continens, *XLIII. 4. ibd.* cfr. *K. Förordn. d. 21. Januar. 1773.* *K. Br. d. 9. Januar. 1754.* om den som skurit manar och svansar af kreatur; vel *carceris* pœna, *VII. 3. XVI. 5. in fin. MGB.* abscisse est proposita; verum &, quorum pecuniaria quidem qua partem est *multa*, sed vel cum *infamia*, *XIII. 3. 4. JB. VIII. 3. HB. VIII. 3. MGB. XV. 14. in fin. RB. XVII. 18. ibd.* quæ & *furto* omni adhæret, cfr. *RABENIUS de infam. juris §. 15.* vel cum *probrosa* quadam dedecoris notatione *XX. 11. MGB. coll. cum K. Förordn. d. 30. April 1777.* *K. Br. d. 24. Januar. 1751.* om *Kyrko Betjente*, som uptaga och sedan försälja Likkistor; vel cum *operarum aut carceris* pœna, *XVIII. 1. 7. in fin. XX. 1. 5. 7. XXI. 6. coll. cum K. F. d. 20. Januar. 1779.* vel cum remo-

remotione denique ab officio VIII. & HB. in fin. XIX. 3.
 MB. conjuncta: quæque ideo, in tres ordines, *Atrocissimum*-
rum, *Atrociorum* & *Atrocium* distingui solita, communi
 nomine *Majora crimina* adpellantur. Posteriori contra
 classe ea tantum comprehenduntur delicta, quæ *Minora*,
 mindre brottmål XXV. 5. RB. dicuntur, & quorum tres
 pariter *ordines* constitui sueverunt, *Levum* nimirum, in
 quibus pecuniaria mulcta, ubi reus solvendo non fuerit,
 & ejus conditio non obstet, in poenam *fusigationis*, *vir-*
garum ac *operarum*, XVI. 4. XVII. 3. in fin. XIX. 1.
 XXVIII. 1. cfr. V. 1. 5. StrB. & K. Br. d. 5. Dec. 1739.
 commutari potest: *Leviorum*, in quibus non alia, quam
 in *carcerem ad aquam & panem* mulctæ commutatio jure
 est concessa II. 2. III. 1. in pr. LIII. 3. in fin. L.V. 1. 2.
 MGB. coll. cum K. Br. d. 9. Junii 1780. & d. 24. Aug.
 1784. Et *levissimorum*, in quibus vel *publica* nulla regula-
 riter datur *affio* XXXV. 3. 4. LX. 6. MGB. coll. cum
 XXXV. 6. ibd. & K. Br. d. 11. Junii 1740. vel in locum
 deficientis mulctæ aut simpliciter *carceris* poena, LIII. 3.
 in pr. XLVII. 1. in pr. MGB. aut mitior quædam alia co-
 ërcitio K. Förordn. emot *svalg och drycken*. d. 17. Apr.
 1733. §. 2. surrogatur. Quemadmodum autem hunc uni-
 cum *præscriptibilium* characterem esse voluit Legumlator,
 ut *culpa ex illis contradicta ære redimi & piari queat*; ita per
 se jam patet, *Majorum omnium criminum*, quod puniri ea-
 dem publice intersit, perpetuam omnino esse accusatio-
 nem; & proinde *minoribus* solum *delictis*, quatenus alicui
 ex eorum genere expressa non obstet exceptio, hoc indul-
 tum esse, ut *præscriptione* extinguantur. Excepta vero quæ-
 nam censenda sint ipsa edocemur Legis littera. Ea nimirum,
 quæ,

quæ, quamvis pecuniaria vindicentur pœna, vel tamen dolosam continent eorum, qui extra defensionis statum positi sunt, læsionem (*Nidingsverk*); vel falsi qualemunque crimen (*suck och bedrägeri*) involvunt. Unde & facile elicies actionem ex delictis, quæ e. c. XII. 2. MGB. in fin. IV. 6. GB. in pr. XIII. 8. ibd. IX. 11. XI. 4. XII. 9. HB. IV. 3. *UtsB.* notantur, nullo temporis lapsu elidi posse. Cur autem horum criminum reis, præscriptionis beneficio, succurrere noluerit Legislator, ratio in promtu est. Etenim, licet his infamiae macula, ad omnes, quæ eam regulariter comitantur effectus, legibus nostris non incurratur: ipsa tamen hæc eorum facta publicæ securitati & fidei adeo sunt adversa, ut communi omnium judicio, ad insidias, *raptum* & *furtum* proxime accedere videantur. Quocirca & tantam produnt malitiam animique improbitatem, ut qui iis se polluerint, capitis velut diminutionem aliquam passi, indigni jure meritoque habeantur, qui publicæ animadversionis opprobrium unquam effugiant. esr.
RABENIUS l. cit. §. §. 9. 14.

§. VII.

Sed hæc fortassis clara fatis & perspicua. At notata præterea in Jure nostro ocurrunt crimina haud pauca, de quibus in utra, quarum meminimus classum censenda fint, ob infinitam sub qua semet offerunt circumstantiarum diversitatem, certi quid decernere generatim non potuit Legislator, Judicis igitur arbitrio permittere coactus, quam in casu quovis speciali pœnam, an pecuniariam, an corporalem, an careeris reo infligi, æquitati & analogia

giæ juris conforme maxime videatur. Non enim, ut rete JULIANUS l. l. 10. 12. ff. de Legibus, leges, neque Senatusconsulta ita scribi possunt, ut omnes casus, qui quandoque inciderint, comprehendantur; sed sufficit ē ea, quæ plerumque accidunt contineri: Neque possunt omnes articuli singillatim aut legibus aut Senatusconsultis comprehendendi: sed cum in aliqua causa sententia eorum manifesta est, is, qui jurisdictioni præest, ad similia procedere, atque ita jus dicere debet. Hujus generis sunt delicta, quorum XVIII. 3. HB. VIII. 4. XIII. 2. XXII. 5. LI. 1. LX. 5. ubi straffes med fængelse eller bøter ēc. LXI. 3. MGB. IV. 2. StrB. I. 8. UtsB. fit mentio: de quibus ergo an & quoisque præscriptione tollantur, non inutiliter quæri videtur. Ex nostro qualicunque judicio hoc quidem satis est expeditum, non posse actionem ex hisce delictis ulla præscriptione extingui. Etenim cum criminibus, quæ pecuniariam respuunt multam, nunquam præscribatur; horum autem, de quibus nobis jam sermo est, ea sit ratio, ut, caussa nondum cognita, statui omnino nequeat, utrum pecunia piari, an corpore lui debeant: haud difficulter perspicitur inevitabilis id esse necessitatis, ut ad judicium delata, præscriptionis quamvis exceptione opposita, qua singula sua momenta sollicite ibidem discutiantur. An vero, si inquisitione legitime peracta, adparuerit, factum gravioribus vestitum non esse circumstantiis, quam ut reo culpam ære redimere liceat, mulcta tum ei, ob præscriptivum diem ante caussæ in forum deductionem elapsum, condonanda, & actio quasi pro infecta habenda sit, ambigua magis est quæstio: quam equidem tamen adfirmandam judicarem. Objici forte posset, eam esse præscriptionis indo-

lem, ut *directe* ab *actione*, a *pœna* vero *indirecte* tantum & per consequens liberet; adeoque *illa* data, ut *hæc* cellet, ejus ope effici non posse. Verum subtilies hoc quam solidius dicitur. Eo namque in primis consilio actio his in casibus suscepta intelligitur, ut constet, num quod reo intentatur crimen præscriptibile sit an minus. Probato autem jam priori, quæ ratio ut ad pœnalem sententiam ferendam provoletur? Nulla sane, nisi quis ea sola ex causa, quod omnes factorum de quibus quæritur circumstantias prævidere non potuerit Legumlator, iniquiorem esse vellet horum conditionem, quam cæterorum, qui graviorum haud raro, quorum definita in lege exstat multa, accusantur; quod ipsum quam male cohæreret, nemini esse potest obscurum. Monuisse interim juvabit præscriptionem ad erimina quæ a privatis qua talibus committuntur videri restrictam. Saltim, ut actionibus, quæ communis civitatis nomine, contra publico defunctos munere, de officio perperam aut negligenter administrato, instituantur, si vel culpam, cuius rei aguntur, graviorem haud esse contigerit, quam ut in pecunia pro ea satisfieri queat, cum effectu eadem opponatur, vix ac ne vix quidem publicæ feret salutis ratio.

§. VIII.

Suboriri autem posset alicui & hæc dubitatio, *an ad exceptionem præscriptionis adtendi jure debeat in criminibus, quæ pecuniaria quidem luuntur multa, sed ex quibus reus simul ad palinodiam in Judicio publice canendam condemnatur?* Quorum exempla XIV. 2. 3. in fin. XV. 3. 6. 7. 8. 9.

XVIII.

XVIII. 8. LX. 2. 5. MGB. XIV. 7. RB. habentur. Pendere quisque videt hujus quæstionis decisionem ab alia, an nimisrum actio ad recantationem injuriarum vel *civilis* vel *criminalis* sit existimanda, qua super & Doctores in diversa abiisse, & inter Pragmaticos, in foro etiam patrio aliquando disputatum novimus. Quod hanc jam adtinet, negari quidem nequit *palinodiam*, in se subturbanam, dum invito & reluctant per modum sententiæ injungitur, vindictam sapere, & eo tendere ut lividae & mordaces maledicorum linguae a rodenda aliorum fama tanto efficiacius avocentur. At quidquid hujus sit, fatentur tamen jam plerique, illam e Judiciis Ecclesiasticis in forum civile traductam, & velut in locum usitatæ apud Romanos *estimationis injuriarum*, qua, in suum licet arbitrium collata, famæ suæ, quotquot ejus tuendæ studiosiores erant, haud satis prospectum judicarunt, surrogatam, re ipsa & si secundum primarium suum scopum spectetur, non aliud continere quam civilem illatæ injuriæ reparationem. Quoniam scilicet abjectoris animi visum est, existimationem suam, vitæ ipsi æquiparandam, pecunia metiri velle; & jus tamen æquitasque postularent, ut eidem, sicuti læsa fuit, idonea aliqua ratione satisficeret; non commodus aliud, ipsiusque damni dati indoli congruum magis cogitari potuit ejus resarcendi remedium, quam ut qui convictiatus fuisset aut diffamasset, ad injuriam publice agnoscendam culpamque follenniter deprecandam adigereatur. Cum itaque sic depreciationem istam non præcise civitatis ulciscendæ, sed potius indemnatis læso procurandæ causa introductam esse, eamque proinde poenæ proprie sic dictæ vicem tueri non posse satis jam liqueat;

cfr. CARPOV. *Jurispr. for. Romano Saxon.* P. IV. *Conſt.* 42. *def.* 2. & *Ejusdem Praet. crim.* P. II. *Quaſt.* 94. n. 55. *seqq.* Juri autem in ſuum favorem conſtituto renunciare cuivis integrum ſit: dubitandum minime videtur, quin & *præſcriptione* ejusdem præſtandæ neceſtitas tolli queat, & id quidem tanto magis, quanto evidentius ſit, in plerisque iis caſib⁹, in quibus actioni ad palinodiam præſcribitur, aut derelictæ a reo accusationis, aut cauſæ privata transactione compositæ præſumptionem adere. Neque ullum hic diſcrimen faciendum arbitramur, utrum quis privato ſuo nomīne, an quatenus publica indutus fuit perſona injuriam paſſus fuerit, cum ubi posterius obtigerit, ciuitatem ipsam indulta criminis præſcriptione, jure ſuo ad læſæ ſuæ dignitatis reparationem impetrandam cefſiſſe; *Mandatario* vero, ut *actionem*, qua *Dominus ipſem* ſe abdicavit, persequendam ſibi arroget, neutiquam conuenire, extra controverſiam poſitum videatur. An autem hoc eo uſque extendendum ſit, ut & crimen de quo V. 2. *MGB.* in *fin.* diſponitur præſcriptibilibus accenſeatūr; vel annon potius exceptio, *laſſeligt tal & Konungen*, ad ſingulas criminis majestatis species in rubro *cap. cit.* conneſtas proferri debeat, arduum valde eſt definitu. Quemadmodum & multum habet dubitationis annon acceptio, *flag Å fbråldrar*, ad ſpeciem etiam criminis XIV. 2. *MGB.* in *fin.* notatam exporrigenda ſit, præſertim cum in rubrica capitilis voce *Fbråldrar & vitricus & noverca & ſocer & ſocrus* comprehendantur. Si tamen exceptiones haſce, ſtrictiſſime, ut alias, interpretandas, easque ad regulam, de omnium criminum pecuniaria multa luendorum adciuacionibus præſcriptione abolendis, in caſi-

casibus non exceptis firmandam facere quis dixerit, non
fane is, quod oppido absurdum fuerit, urgere existimabi-
tur. Nos interim, donec authentica aliquando horum lo-
corum explicatio accesserit, nostrum, cui nihil omnino
tribuimus, judicium lubentes suspendimus.

§. IX.

Alterum, quod speciatim considerandum se nobis of-
fert, momentum, *tempus* est *præscriptioni* horum, de qui-
bus jam egimus, criminum *præfinitum*. Est illud BIEN-
NIUM INTEGRUM; & quidem naturaliter, ut dies cœptus
non habeatur pro finito, ac secundum dies *continuos*, nec
utiles tantum, computandum, hac tamen cum cautione,
ut si peremptorius dies in feriatum inciderit, *præscriptio* ad
proxime insequentem diem *utilem* currere intelligatur, ar-
gumento *XXV. 23. XXX. 9. RB. K. Br. d. 17. Febr. 1757.*
Et quia ab ultima retro antiquitate in patria invaluit, ut
fatalibus temporum spatiis ad annum vel plures proten-
sis, noctiduum unum toti intervallo in complementum
velut superaddendum concedatur, unde formula solennis
Natt och år; neque dubitatum iri in foro crediderim, quin
& hic eadem observanda veniat computandi ratio. Si vero
quærendum obtigerit, ubinam ponendus sit *terminus a quo*,
quem ajunt, unde initium ducat biennii hujus computatio,
distinctio facienda erit inter crimina quæ vel unico absolvun-
tur actu, vel plures actus ad sui consummationem desiderant,
vel denique sæpius fuerunt iterata. In *istis* enim a die ipso
perpetrati delicti: in *illis* a die ejusdem consummati: in *his*
vero a die quo idem ultimum commissum fuit, *præscri-
ptio-*

ptionis cursum incipere manifestum est. Sic crimen *famosi libelli* de quo *LX. 5. MGB.* in med. non elapso a die consignati, sed a die divulgati libelli, biennio, præscriptum censeri debere per se patet. Non enim ante editum in vulgus libellum perfectum est crimen, quod & propterea ex eo, ubi hoc accidit, loco forum sortitur, *X. 23. RB.* An autem delinquenti fugitivo prosit præscriptio, apud Doctores controvertitur. In nostra quidem patria rarius eveniet, ut criminis alicuius præscriptibilis reus, pœnæ inde sibi imminentis vitandæ caussa, fugam capessat. Veruntamen cum fieri id non repugnet, haud abs re erit & hanc quæstionem, legibus nondum decisam, leviter attigisse. Putant nonnulli ferendum non esse, ut aufugæ currat præscriptio, quoniam nimirum per Magistratum non steterit, quod inquisitio non fuerit formata nec reus condemnatus, sed ipsius culpa & fuga moram invexerit, quæ a pœna ipsum liberare non possit. At horum adsertio *THOMASIO diff. cit. §. 43.* eo tantum in casu concedenda visa est, dum contra aufugam, antequam evaserat, processus vel inquisitorius vel accusatorius institui cœptus fuit: adeoque in casu opposito rationes ab iis adductas ad negandum fugitivo præscriptionis beneficium valere non posse. Et hunc fere in sensum in *Constit. Crimin. Theres.* *I. cit. §. 8.* sancitum legitur, non debere ullam fugitivo prodesse præscriptionem, nisi vel crimen ipsum cum suo auctore, vel per vulgato quidem criminе, fugitivum tamen ejus auctorem esse, toto currentis præscriptionis intervallo ignotum permanserit. Quæ qua ratione nitantur, nostrum jam non est disquirere. Si secundum quod domesticis legibus convenientissimum fuerit, sententia hac in caus-

caussa ferenda erit, id in aprico positum existimaverim', non posse a fugitivo, notoriū criminis reo, de quo, simulac disparuit investigando, publicis denunciationibus e. c. laboratum fuit, ad præscriptam sibi biennii absentia a pœna immunitatem unquam provocari. Cum enim publica denunciatio, cunctis fatentibus *citationis editalis* vicem subeat, palam est non posse non ea ipsa præscriptionis cursum impediri. Peracta præterea citatione, ut accusacionis factum censetur initium; ita hujusmodi aufugæ reduci præscriptione subvenire velle, idem plane foret, ac si inquisitus, carcere elapsus, hoc ferret violatæ custodiæ præmium, ut si modo latere aliquamdiu noverit, impuni sibi in posterum agere liceret. Sin cognitum reum, qui in fugam se contulit, investigare, quorum interest, operæ pretium non judicaverint; hic vero finito jam præscriptionis tempore, sua sponte reversus fuerit: nescio an ex eo crimen conveniri amplius in foro possit. Renunciatum quippe a civitate actioni videtur. Quod idem, qua reum, qui absque auctorita latendi caussa peregre biennium degit, dominum reducem, postea vero patrati ante criminis infimatum, tanto magis adsfirmandum esse, in propatulo est.

§. X.

Non ergo procedit præscriptio nisi (1.) præscriptibile fuerit crimen, & (2.) integrum a die, quo admissum fuit, effluxerit biennium, idque (3.) nemine, nec privato nec publico Actore accusationem interea legitime intendente. Ad reum autem ipsum regulariter pertinet hanc præscriptionis exceptionem allegare, eamque, ubi opus fuerit

D

ido-

idoneis probationibus ad liquidum perducere, XVII. 33. RB. Quia tamen in judicio criminali Judici incumbit, pari omnino cura, religione ac fide in iis quæ ad tuendum, quam quæ ad condemnandum reum faciunt, exquirendis versari; consequitur inde, ejus etiam esse illam, ubi reus eandem, ex actis quamvis manifestam, opponere non intellexerit, ex officio supplere. cfr. XIII. 1. in fin. & XVII. 13. RB. Et est hoc quidem tanto evidentius, quanto certius fit Judici minime competere, ut, quam legibus sublatam videt actionem, ipse cuiquam indulgeat.

§. XI.

Probata autem legitime præscriptione is ejus est *effictus*, de hoc namque videndum jam succedit, ut *actiōnem* perimat, non *pænalem* tantum, sed & ordinarie ac plerumque connexam cum illa *civilem* & *rei persecutoriam*: qua & re fit, ut reus, si vel delictum confessus fuerit, & a mulcta, & a damni resarcitione in totum liberetur. Verum de his non dubitatur. At gravis alia moveri hic solet quæstio, an nimirum, si quod præscriptione sublatum est crimen, de eorum fuerit genere, quorum confessi & convicti, ad datam offendam publice in cœtu sacro deprecandam, ex institutione Ecclesiastica, compelli fuerunt, qualia sunt de quibus e. c. III. 4. MG. coll. cum K. Br. d. 20. Dec. 1737. XIV. 2. 3. MGB. coll. cum K. Br. d. 11. Maii 1698. XXVIII. 1. MB. coll. cum K. Br. d. 14. Nov. 1746. LIII. 1. LV. 1. MGB. K. Br. d. 18. Novemb. 1741. &c. vindicandis agitur, hujus quoque depreciationis faciendæ necessitate, simul exsolutus censeri debeat reus, etiam-

etiamsi & crimen ipsum notorium sit? Vix quisquam a-
deo est ignarus ut nesciat esse hoc de natura Ecclesiæ, tan-
quam Collegii, ut quos fidem, dum in suum reciperentur
tum, datam fregisse, & contra stipulatas pacti conditio-
nes publicis se commaculasse deprehenderit criminibus,
sua communione, ceu qua ipso suo facto exciderunt, ex-
cludere queat; verbo: competere ei *ius*, quod vocant, *ex-communicandi*. Per se pariter liquet, quod si excommu-
nicatus in Ecclesiam denuo recipiendus erit, necessarium
prostus sit, ut ante quam admittatur, illatam injuriam pu-
blice in concione agnoscat, veniam ejus suppliciter ex-
petat, & vitæ in futurum emendationem polliceatur: at-
que hoc quidem Ecclesiam recte & eodem plane jure ex-
igere, quo Iæsus unusquisque ab eo, qui serio in gratiam
secum redire intendit, & injuriæ agnitionem & in posterum
securitatem depositit. Hinc & olim, quamdiu extra civi-
tatem positus erat Christianam religionem profitentium
cœtus, & sanctior in illo vigeret morum disciplina, nulla
fere alia in re, quam hac ipsa ac jam diximus, *pœnitentia*
quæ adpellari suevit *Ecclesiastica* consistebat. Præmitti qui-
dem solebant certi probationum gradus, pro dati scandali
magnitudine modo plures, modo pauciores, quibus, quod
& res ipsa flagitabat, fides Ecclesiæ fieret, peccatorem ad
saniorem rediisse mentem, nec simulatum esse, quod præ
se ferebat vitæ emendandæ propositum. Sed nulla his o-
mnibus tum inerat pœnæ imago: nec ulli invito hæc tum
agenda obtrudebatur *pœnitentia*. Sua potius sponte hanc
unusquisque eligebat viam, qua restitutionum velut in in-
tegrum, & redditum ad Ecclesiæ, unde ejectus erat, con-
sortium sibi pararet. cfr. BOEHMER *Jur. Eccles. Prot.*

Lib. V. Tit. 38. §. 3. Si adhuc dum invariata sua huic disciplinæ conservata esset facies, quis non videt, frustra agitatum iri, quam excutiendam nobis sumsimus controversiam. Verum a longo jam tempore a primæva ejus puritate ac innocentia est descitum. Non jam loquar, quantum ad immutandum ejus habitum contulerint errores varii, quibus foedata pedetentim fuit ipsa cœlestis doctrina: non quam turpes intempestivus zelus & familiaris Clero in conscientias dominandi pruritus eidem subinde adsuerit lacinias. Vid. THOMASIUS *ad Lancel. Inst. Jur. Canon. Lib. II. Tit. V. p. 675. seqq.* Hoc unum dicam, vix ac ne vix quidem, ex quo Ecclesia civitati intime innexa fuit, caveri potuisse, quo minus, ut *excommunicatio*, sic & ejus tollendæ remedium *pœnitentia*, vel in quam jam abiit, *deprecatio publica*, per modum necessitatis & judiciali sententia irrogari cœpta, pœnisque criminalibus in cumulum velut adjecta, varios, qua eos præsertim qui dominanti in civitate religioni adhærerent, fortiretur effectus civiles, eoque ipso a primo suo instituto quam longissime deflechteret. Certe ea jam est ejus ratio, ut parum absit, quin aut collari ferreo ad palum alligari, aut in concione sacra pœnitentiali sellæ imponi, pariter ignominiosa habeantur. Unde & factum, ut eum olim hæc deprecatio nonnisi in totius Ecclesiæ conspectu peragi soleret; hoc autem in gravius plerumque, quam quod meruissent, reorum vergeret dedecus, foedissimisque proinde sceleribus, ejus vitandi caussa patrandis, ansam suppeditaret; nostratibus e communi jam diu salute judicatum furerit, minus *publicant* aliam, qua leviora delicta, in *publicæ* istius vicem surrogari. *K. Br. d. 20. Maii 1699. d. 18.*

No-

Novemb. 1741. cfr. K. Br. d. 17. Octob. 1778. Quantumvis autem ex his manifestum sit fieri amplius non posse, ut plebi persuadeatur penitus, omni hunc ritum contumelia vacare, nec, quod pœnam referat, quidquam ei inesse: nihil tamen minus, si causa, non ex opinione vulgi, sed, ut decet, ex legibus æstimetur, adfirmandum omnino erit, euni ne adhuc dum quidem in Jure aliter considerari, quam ut religiosum quandam actum, quo pœnitens reus datam offensam oblitterare & ecclesiam sibi reconciliare laboret. *Cfr. Kyrk. Ordn. Cap. IX. §. 1. K. Br. d. 24. Januar. 1770. K. Refr. d. II. Febr. 1780.* Quemadmodum vero hinc nullo jam negotio colligitur eandem plane, quæ in privatis injuriis *palinodiae* est, in injuriis Ecclesiæ velut illatis hijus *deprecationis* esse rationem, hancque ad Ecclesiam indemnem quasi ex scandalo præstantam unice esse directam: ita & pronum ad intelligendum fuerit, nihil obstare, quomodo a parte Ecclesiæ eidem renunciari, eaque ideo præscriptione tolli queat. Sed quantumvis hoc sua radiare videatur luce, sunt tamen qui jure fieri posse negant, ut Ecclesiæ jus exigendæ deprecationis quocunque sub titulo legibus civilibus auferatur. In his est **CARPZOVIUS** *Jurispr. Consist. Lib. II. defin. 282.* item **BRUNNEMANNUS** *Decis. Cent. I. dec. 82.* & hos secutus **VILDVOGEL** *Diff. de eo, quod justum est circa deprec. Eccles. C. VII. Thes. 3.* & distinguendum in primis urget **CARPZOVIUS** inter *crimen publicum* & *scandalum* Ecclesiæ datum: illud pertinere ad forum soli & interesse Magistratus: Hoc autem ad forum poli. Remissa ergo criminis pœna nec **DEO** satisfactum nec scandalum sublatum censerri posse. Quare si

Princeps poenæ gratiam delinquenti fecerit, indulgentiam hanc ad præjudicium offensi tanquam tertii trahi haud debere, ne ei jus suum auferendo contra naturalem æquitatem peccetur. Deprecationem publicam rem esse, quæ ad Ministerium verbi pertineat, quod & inde Ministerium reconciliationis dicatur: & Magistratui ut ei se immisceat fas non esse. At quis est qui non videt, ex inquinatissimis Juris Canonici fontibus & a notione Ecclesiæ ut Status, Statui civili oppositæ, hæc omnia esse derivata. Non quidem negandum est, posse a Principe, ubi id in commune profuturum judicaverit, ut *ad gratiationis*, sic & *præscriptionis* effectum ad solam poenam restringi, ut hac quamvis sublata, qui notorii criminis reus est nihilominus ad deprecationem in Ecclesia faciendam teneatur: qualis etiam, in adgratiationibus, restrictionis, in patria occurrunt exempla. *K. M. Pardons Placat d. 28. Sept. 1675. d. 17. Mart. 1719. d. 3. Maii 1720. d. 26. Nov. 1751. d. 26. Aug. 1772.* Sed de hoc jam non quæritur. Quæritur tantum, an non Principi jus sit eo usque extendendi præscriptio-
nis effectum, ut & ad abolendam valeat hanc deprecatio-
nem? Atque hoc est quod sine apertissima absurditate ne-
gari non posse existimaverim. Quæ contrariæ sententiae patroni adferunt argumenta, deprecationem hanc esse ju-
ris divini: eam ad DEUM placandum & reum in foro di-
vino justificandum esse comparatam: Ministerio item ver-
bi potestatem ejus irrogandæ competere; istiusque potes-
tatis exercitium ab inspectione imperii civilis esse exem-
tum, ea adeo jam dudum sunt explosa, ut puderet fere
nos iis confutandis immorari. Miremur potius viros E-
vangelicæ religioni addictos eo absurditatis prolabi potu-
isse

isse ut talibus uterentur armis. Quod vero introducta generaliter præscriptione criminum, & ipso actu voluerint leges nostræ, ut simulac hæc accesserit, cesset etiam quæ alias forte locum habitura fuisse deprecatio Ecclesiastica, id quidem perspectu haud est difficile. Liqueat ex antecedentibus, in eo, inter alia, fundatam esse hanc præscriptionem, quod sotpum præsumatur temporis lapsu, quod quis suo delicto peperit scandalum, nec publicæ rei interest, illud denuo in memoriā hominum revocari. Si jam reum hoc nomine ab actione liberandum sanxit Legulator, an putandus est dedisse hoc tamen Ecclesiæ, ut sua eum nihilominus vexet censura: ut obliterata ad suam cognitionem trabendo crima communem turbet quietem; & ut commenticia sua feveritate, legum civilium indulgentiam, tanquam morum honestati exitiosam, condemnnet? Absit ut hoc quisquam sibi persuadeat. Cum præterea jam dudum & gravissimis quidem de cauiss, iis circumscriptum fuerit cancellis potestatis ecclesiasticæ exercitium, ut, nisi, in notatis peculiariter casibus, ultro fortasse quis se obtulerit, *K. Refr. d. II. Febr. 1780.*, non liceat Ecclesiæ, absque prævia sententia Judicis condemnatoria, vel admittere quemquam ad crimen suum sollenni formula deprecandum; *Kyrko Ordn. Cap. IX. §. 2.* credendum autem non sit mutatum hoc voluisse Principem, aut Cle-ro indultum, ut in cives non auditos nec convictos, ex suo arbitrio hac notatione animadvertat: manifestissime inde consequitur, non posse non negata ex capite præscriptionis in foro criminis alicujus actione, deprecacionem etiam ejus præscriptam, censeri.

§. XII.

§. XII.

Diximus *§. præced.* eum ordinarie & plerumque esse *Præscriptionis criminalis* ex Jure nostro effectum, ut cum ipsa *actione paenali*, *civilem* etiam eidem connexam extinguat. Cum itaque sic clare satis indigitaverimus, videri nobis, unum saltim vel alterum casum, ubi hoc non procedat esse excipiendum; necesse jam est, ut quosnam hos esse opinemur, distinctius paullo explicemus. Nullam quidem a Legumlatore exceptionem proditam unicuique in oculos incidit, concepta scilicet generaliter lege -- *hafve sedan ingen rått att öfver den förmenta förbrytelsen klagat.* At impetrare tamen a nobis non possumus, ut eum huic sanctioni tribuamus sensum, ac si in caussis adulterii, *præscripta* biennio criminis actione, actio quoque civilis ad divortium, innocentii conjugi *præscripta* debeat existimari. Multæ sunt, quæ hanc nobis persuadent sententiam, rationes. Nemo ignorat, esse hoc naturalis juris, ut data acceptaque vicissim matrimonialis fides, illibata inter conjuges servetur; atque hac violata, ruptum simul ipso facto esse conjugale fœdus, nonnisi accedente novo innocentis conjugis, consensu, & eo quidem *expresse* aut *factis positivis* declarato, redintegrandum. Si jam quis legem sibi fingeret civilem, quæ divertendi a nocente conjuge licentiam innocentii denegaret, huncque invitum, ad pactum ab altera parte violatum continuandum compelleret; esset sane illa de eorum numero, quæ, ad evertendas rerum ipsarum essentias directa, certissimum foret vel tyrannidis vel stultitiae argumentum. Quia vero ullam talem in civitate bene constituta exstituram unquam *præsumi*

fumi nequit, apertissima quippe sua iniquitate se ipsam confutaturam; neque dubitari potest, præscriptam *adulterii actionem*, ad abolitionem *actionis ad divorcium* extendendam minime esse. Forsan notabiles nullas in civitate turbas excitaret, iniquior in se licet, Lex, quæ uxoribus divorcii ex hac causa actionem præscriberet. Docuit namque omnis ævi experientia, eas, utpote novum difficultius inventuras maritum, ad furtivos horum amores condonandos esse faciliores. Sed si maritis eandem ferri legem accideret, næ tum paci ac felicitati publicæ grave impingeretur vulnus. Nulla unquam existit gens paullo moratior, quæ non arctiorem a feminis quam a viris desideraverit pudicitiae custodiam. Si quis ejus rei rationem quærat, reddat eam nostro nomine RITTERSHUSIUS *Sacr. Lebt. Lib. VIII. c. 2.* hanc nempe: *quod quando nupta nostra cum alio viro rem habet, incerta nascitur soboles & maritus pro suis liberis agnoscere cogitur, qui non sunt, sed in ipsius thalamum suppositi, sicut cuculum ajunt ova sua in cruciæ nidum imponere ab hac sovenda excludendaque; & quemadmodum perditæ aliena ova sibi supponere prohibentur.* Hæc partus & familiarum confusio plurimum noceret reipublicæ & ingenuitati, bonæque indoli & educationi, quæ fundatum & basis est reipublicæ. Non est autem hoc idem metendum in altero quoque casu. Nam extra justas nuptias natim matrem sequuntur, quæ semper est certa; sed pater is esse præsumitur quem justæ nuptiæ demonstrant. Cfr. MONTESQUIEU de l' *Esprit des Loix L. XXVI. c. 8.* Et sane tanti ponderis hæc ipsa est ratio, ut qui ejus vim rite perspexerit, vix ambiget cum GUNDLINGIO *diss. hujus argum. §. 8.* pronunciare, de *Jure naturæ stricte sic dicto*, ad quod in

foro, ubi externæ pacis turbamenta cavitur, potissimum respicitur, hoc esse, ut *ubi de adulterio queritur, major castitatis femineæ quam virilis habeatur ratio.* Unde nec mirum, quod non minus Jure Mosaicō *Lev. XX. 10. Deut. XXII. 22.* cfr. MICHAELIS *Mos. Recht* §. 259. quam Romano l. 6. §. 1. ff. ad *L. Jul. de adult.* l. 225. *de verb. signif.* adulterii notio ad concubitum cum aliena uxore esset restricta; quodque eadem aliis plerisque in orbe Christiano populis placeret hujus criminis definitio, donec tandem spiritualitatis idea matrimonio adscita, *Patrum & canonum auctoritate*, inde discederetur. Saltim hinc apparet, ad præjudicatas opiniones referendum habet esse, quod uxorum in hoc genere perfidiam patienter tulisse maritis contumeliosum vulgo censeatur: quod item, quamvis & nonnulli tam firmo reperiantur stomacho, ut istam concoquere valeant injuriam, hos tamen infinite pauciores esse oporteat illis, qui delicatiōri prædicti sensu impertrare a se id nequeunt, ut adulteram in thalamo retineant. Quo autem, cum haec ita sint, luculentius pateat, nulla unquam tristiores exitus habitura fore matrimonia, quam ad quæ, uxorum infidelitate rupta, restauranda coherentur mariti: eo quoque evidentius est, vix ac ne vix quidem a calumniosæ ludificationis nota prudentioribus excusatum iri eam legis interpretationem, quæ verbis inhaerens, reclamante ipsa pacti conjugalis indole, summam felicitet in conjugibus animorum confessionem efflagitante, adulterii præscriptionem, ad auferendam etiam marito divortii actionem prorogaret. Quibus ex argumentis simul conficitur, idem omnino tenendum esse de stupro ab uxore cum adhuc soluta esset admissa, quod nimirum, licet

licet ante exactum jam integrum a die nuptiarum bienium, ad mariti notitiam non pervenerit, huic nihilominus salvum sit jus suum, modo suo facto in redintegrationem matrimonii non consenserit, ad ejus dissolutionem provocandi. cfr. XIII. 7. GB. & J. I. ibid.

§. XIII.

Quibus modis impediatur præscriptio, & quibus argumentis elidenda sit allegata ejus exceptio ex dictis sati liquet. Non autem prætermittendum est, pertinere & hoc ad præscriptionem criminalem, quod negetur certis in casibus actio, ex rationibus noviter repertis, contra latam semel sententiam absolutoriam vires rei judicatæ adeptam. Fuit primum renovandis criminum accusationibus hic obex positus vi *litt. Reg. d. I. Mart. 1750.* quibus indirecte, edicebatur ne quæ in rem judicatam abiisset sententia, in caussis criminalibus, quæ pecuniariam admitterent luitionem, sub prætextu repartarum noviter rationum ad novam pertraheretur cognitionem. Quarum deinde sanctionem confirmavit supra laudata *Constit. Regia d. 20. Januar. 1779.* hoc cum additamento, ut idem quoque obtineret in criminibus Majestatis, vernacula voce *Statsbrott* appellatis. De prioribus istis, præter ea quæ ante jam allata sunt, dicere nil adtinet. De posteriori loco nominatis paucissima monebimus. Quænam crima sub voce *Statsbrott* comprehensa voluerit Legumlator, nefcio an ambiguum cuiquam videri debeat. Certum quidem est nullam illius, Codici Fridericiano incognitæ, ulti bi in legibus traditam esse definitionem; quam nec e K.

Kun-

Kungðr. d. 21. Aug. 1765. & Kungðr. om Porto Franco i
Marstrand d. 15. Aug. 1775. §. 9. in quibus occurrit, facile elicies. At quantumvis periculosum in Jure haberis soleat, vagam & incertam hujusmodi termino adhaerere notionem, quippe a qua malis sub Principibus maxima semper quæsita est saeviendi materies, MONTESQU. l. c. L. XII.
c. 7. in fin. non tamen iis jam vivitur temporibus, ut his terreamur umbris. Adsumimus potius tanquam indubium, non extendi hujus vocis conceptum ultra eorum criminum ambitum, quæ capp. IV. V. VI. MGB. continentur. Quod vero eos, qui, rara felicitate, e tremendo *Majestatis judicio* incolumes semel evaserunt, qualibuscunque novis rationibus productis, inquisitioni denuo subjiciendos noluerit Legumlator, id quidem sapientissime est provisum. Si enim iterare liceret rejectam horum criminum accusationem, *accusationum scilicet omnium complementum*, nulla unquam his, qui in eorum incidenterunt suspicionem, speranda foret securitas. Quis namque non videt, non defuturos, eum in casum, aut Principi, aut dominantis inter civiles discordias factionis antesignanis, vel *Delatores*, qui operam suam & nequitiam ipsis ad invisos sibi homines nescio quibus non fictitarum probationum laqueis irretiendos commodarent vel *Judices* scelerato obsequio in sua ituros vota, legesque ipsas legum sub prætextu eversuros. Sed manum de tabula.

